



## **PRIJEDLOG REZOLUCIJE**

**O VAŽNOSTI OSUDE GENOCIDA U SREBRENICI  
I RATNIH ZLOČINA U BOSNI I HERCEGOVINI  
ZA IZGRADNJU TRAJNOG MIRA**

*Denis Bećirović*

Broj/Број:

Sarajevo/Сарајево: 03.02.2010.

KOLEGIJU PREDSTAVNIČKOG DOMA

n/r predsjedavajućeg Milorada Živkovića

REZOLUCIJA

O VAŽNOSTI OSUDE GENOCIDA U SREBRENICI  
I RATNIH ZLOČINA U BOSNI I HERCEGOVINI ZA IZGRADNJU TRAJNOG MIRA

Na osnovu člana 148. stav (2) Poslovnika Predstavničkog doma Parlamentarne skupštine Bosne i Hercegovine ("Službeni glasnik BiH", br. 33/06), podnosim Prijedlog rezolucije o važnosti osude genocida u Srebrenici i ratnih zločina u Bosni i Hercegovini za izgradnju trajnog mira.

S poštovanjem,

Poslanik SDPBiH

dr. sc. Denis Bećirović

Predstavnički dom Parlamentarne skupštine Bosne i Hercegovine, na osnovu člana IV.4.(e) Ustava Bosne i Hercegovine, na sjednici Predstavničkog doma, održanoj \_\_\_\_\_ 2010. godine, usvojio je

REZOLUCIJU

O VAŽNOSTI OSUDE GENOCIDA U SREBRENICI I RATNIH ZLOČINA U BOSNI I  
HERCEGOVINI ZA IZGRADNJU TRAJNOG MIRA

1. Predstavnički dom Parlamentarne skupštine Bosne i Hercegovine odaje počast svim žrtvama i izražava najdublje saučešće porodicama žrtava genocida počinjenog u Srebrenici, kao i svim građanima Bosne i Hercegovine koji su bili žrtve zločina.

2. Predstavnički dom Parlamentarne skupštine Bosne i Hercegovine ocjenjuje da je privođenje pravdi preostalih bjegunaca osumnjičenih za genocid, zločine protiv čovječnosti i ratne zločine preduslov za izgradnju mira i stabilnosti u Bosni i Hercegovini i regionu.

3. Predstavnički dom Parlamentarne skupštine Bosne i Hercegovine iskazuje nedvosmisleno opredjeljenje da potpuno poštuje Konvenciju o sprečavanju i kažnjavanju zločina genocida i pokazuje spremnost da državnu politiku gradi na vrijednostima mira, tolerancije i pomirenja.

4. Predstavnički dom Parlamentarne skupštine Bosne i Hercegovine ocjenjuje da:

- prihvatanje odluke Međunarodnog suda pravde i ispunjavanje naloženih mjera nije samo obaveza po sudskoj odluci nego i uslov za izgradnju demokratskog, otvorenog i pravednog društva u Bosni i Hercegovini;

- svako veličanje, opravdavanje ili relativizacija genocida i svih drugih povreda međunarodnog prava predstavlja zločin koji ugrožava ustavni poredak, sadašnjost i budućnost Bosne i Hercegovine;

- poštovanje ljudskih prava i prihvatanje odgovornosti podrazumijeva i poštovanje žrtava i preduzimanje svih neophodnih mjera za zadovoljenje prava na istinu, pravdu i garanciju da se zločini iz prošlosti neće ponoviti;

- zaboravljanje zločina i rehabilitacija ideja i ideologija koje opravdavaju zločin i njegove izvršioce predstavljaju nove zločine koji su u Bosni i Hercegovini nedopustivi i kažnjivi;

- potreba suočavanja s prošlošću zahtijeva sistem institucija, mehanizama i procesa koje će nadležni organi Bosne i Hercegovine bez odgađanja formirati i u potpunosti podržavati.

5. Predstavnički dom Parlamentarne skupštine Bosne i Hercegovine zadužuje Vijeće ministara Bosne i Hercegovine da u najkraćem roku Parlamentarnoj skupštini Bosne i Hercegovine dostavi zakonske projekte koji će omogućiti:

- da Bosna i Hercegovina kroz svoj pravni sistem i postupanje državnih organa jasno osudi i sankcionira svaki pokušaj relativizacije genocida u Srebrenici i ratnih zločina počinjenih u Bosni i Hercegovini;

- da Bosna i Hercegovina kroz svoj pravni sistem i postupanje državnih organa jasno osudi svako poricanje genocida u Srebrenici i ratnih zločina u Bosni i Hercegovini;

- da Bosna i Hercegovina ojača pravosudni sistem i stvori uslove za efikasnije gonjenje svih

učesnika u krivičnim djelima koja u sebi imaju elemente genocida, kršenja humanitarnog prava, izazivanje nacionalne, rasne i vjerske mržnje i netrpeljivosti, ratne propagande ili pozivanja na rat;

- da Bosna i Hercegovina u svom obrazovnom sistemu insistira na jasnoj osudi zločina koji su počinjeni u prošlosti i da sistem obrazovanja zasnjuje na potrebi da se mladi u Bosni i Hercegovini vaspitavaju u skladu s općeprihvaćenim civilizacijskim vrijednostima i gnušanjem prema svakom pokušaju opravdanja zločina, uključujući naročito ratne zločine i zločin genocida.

6. Predstavnički dom Parlamentarne skupštine Bosne i Hercegovine podržava tekst Rezolucije o Srebrenici koji je usvojen na Prvoj plenarnoj sjednici Evropskog parlamenta u 2009. godini, 14. i 15. januara u Strazburu.

7. Predstavnički dom Parlamentarne skupštine Bosne i Hercegovine naglašava važnost pomirenja i izgradnje povjerenja među bosanskohercegovačkim narodima i građanima. U tom procesu prevazilaženja tenzija iz prošlosti i izgradnje trajnog mira posebno važnu ulogu imaju religijske zajednice, mediji i obrazovni sistem.

## OBRAZLOŽENJE

Petnaest godina nakon potpisivanja Dejtonskog mirovnog sporazuma došlo je vrijeme da se Predstavnički dom Parlamentarne skupštine Bosne i Hercegovine očituje u vezi s genocidom u Srebrenici i ratnim zločinima u Bosni i Hercegovini.

Usvajanjem ove rezolucije poslanici bi iskazali senzibilitet i solidarnost prema svim žrtvama genocida u Srebrenici i ratnih zločina, kao i prema preživjelim porodicama žrtava. Izglasavanje teksta Rezolucije pokazalo bi jasno opredjeljenje Predstavničkog doma da gradi trajni mir i podržava izvođenje pred lice pravde svih osumnjičenih za genocid i ratne zločine.

Kroz historijski razvoj evropskih zemalja pokazalo se korisnim suočavanje sa istinom i liječenje

nepravdi iz prošlosti. Za izgradnju demokratske države Bosne i Hercegovine u kojoj će svi narodi i građani biti ravnopravni bez obzira na naciju i vjeru nužno je osuditi sve ratne zločine i opredijeliti se za mir, stabilnost, povjerenje i prosperitet u Evropskoj uniji.

Odavanjem počasti žrtvama genocida i ratnih zločina Predstavnički dom šalje jasnu poruku svim ratnim zločincima da Bosna i Hercegovina neće nikada više dozvoliti da se ratni zločini ponove. Time bi poslali jasan signal da genocid i ratni zločini neće biti zaboravljeni i da svi odgovorni moraju doći pred lice pravde.

Sjećanje na genocid u Srebrenici i ratne zločine u Bosni i Hercegovini potrebno je ugraditi u naše zajedničko historijsko pamćenje i u temelje proširenja EU na područje zapadnog Balkana. Ne smijemo pristati na diskriminatorne i isključive stereotipe o pojedinim narodima i pokušajima utvrđivanja kolektivne krivice.

S obzirom da se u Bosni i Hercegovini dogodio genocid u Srebrenici, kao i brojni ratni zločini u drugim njenim dijelovima, bilo bi anticivilizacijski da se Predstavnički dom ne odredi prema ovim zločinima. Također, treba imati na umu da se Evropski parlament oglasio s posebnom Rezolucijom o Srebrenici (14. i 15. januar 2009. ), u kojoj, između ostalog, stoji:

„Evropski parlament sjeća se i odaje počast svim žrtvama okrutnosti tokom rata u bivšoj Jugoslaviji; izražava svoje saučešće i solidarnost s porodicama žrtava, od kojih mnoge žive bez konačne potvrde o sudbini njihovih očeva, sinova, muževa ili braće; priznaje da je ovaj nastavak bola pogoršan propustom da se privedu pravdi odgovorni za ove događaje“.